

榴經堂類藁

籀經堂類藁卷第二十二

晉江陳慶鏞頌南撰

墓誌銘

皇詒授朝議大夫江南安慶府知府前翰林院庶吉士陳君墓誌銘代楊勳督國楨

君陳氏諱煦字泰甫一字曉峰蜀之涪州人其先居于楚後籍是邦八傳累科第曾祖峙康熙甲午科舉人妣黃祖子宣雍正己卯科舉人湖南會同縣知縣加銜通判妣熊蘇考朝龍太學生妣王旌節孝本生考廷璠乾隆丁酉科拔貢庚子科舉人廣西藤縣知縣崇祀鄉賢妣周君兄弟

五人兩選翰林一任中書一司訓導人謂德星之萃陳覺
世有焉弱冠補弟子員乾隆甲寅舉于鄉嘉慶辛酉成進
士與叔父廷達同榜並授翰林院庶吉士閭里榮之壬戌
散館改知縣出為江西信豐令勤于聽斷有政聲旋篆新
建調都昌二縣皆繁劇君至整飭捕務案無積牘逾年授
南昌地瀕江患水潦邑有大有富有二圩漲洊至二穀不
熟君勸倡廉修築民禾大登于其地立陳侯亭至于今
之最報擢升吳城鎮同知政稍清泰檄解運撥船旂丁
役戍約以法事竣攝守臨江時值清江地面逆匪事
起委君巡緝甫半月首惡聶載彥等四案並就獲先

糧由運河道光初年議改海運君往辦南河盤壩疏濬
方當軸稱其能以卓異入奏補知府尋回江右權贛州
有梟匪黃百幅聚衆歛錢而會昌三黃灘教匪已聚攘
為患港不通舟楫者數月矣君先後捕誅得首從分懲
斯民相與歡聲于道城中舊藏棍匪盤踞各門索詐者
之君搜獲剪除無遺孽南安贛鄰府也有逆徒藍姓倡煽
惑君聞不避嫌越境密請當塗剋日查拏得安謐治年餘
權贛南道篆其地為江廣通衢關樞歲萬計君釐剔弊端
稅務日起色甫卸以憂去官服闋赴選道次江甯總督陶
澐廉其材留辦江西鹽務向例江西食淮引唯南贛食粵

鹽至是當事請設廠贛關抽稅粵鹽行至江西淮引地界
議下君力言不便計抽稅每年不及淮引額課十分之二
既無補于國計且踵而甚焉將江西十府淮引統歸于粵
省于鹺政大有窒礙論上事遂寢乃履勘淮界于要隘處
增設卡房添兵巡緝計定私梟為之斂迹數年銷引增倍
淮商之得留西岸君之力也江西數被水省垣食不給而
各縣人民遇糴弗能通君奉委下臨江吉安一帶採買所
至剴切慰諭不匝月得穀米十餘萬石民遂蘇嗣補瑞州
府月餘調安徽太平未幾復以憂去起補授安徽鳳陽其
治之如江右最後調安慶首府君以全省發審總匯力並勤

朝起謁上寮日昃乃返治簿牘晡則鞠諸訟者以為常凡
上官有所咨必盡言無飾與其屬言必誠鄉人士過從必
詢訪利弊故所獻多得其情無疑辭為宰江西三充同考
官得士皆一時名流君性孝友孺慕至老如兒時居兄弟
行凡已仕未仕存者歿者一為區畫有法道光辛丑春三
月五日以疾卒于官春秋六十有七配恭人鄒林皆先歿
側室錢王張戴子曰光緒殤曰光綸婚二皆王出也光綸
扶匱歸里將卜墓于本州增家壩祖塋之側預期郵狀京
師因其族子熾為侍御與余同譜且同職乞為銘余既次
其概復為之銘曰

知類同達幼淹貫兮珥筆詞垣翔華翰兮才非百里暫羈
絆兮美錦學製善組纂兮平反明允宜獄駟兮修固隄防
絕漫漶兮喜雨誌亭立道岸兮襲遂治渤盜賊散兮信臣
治蜀農田灌兮出為循吏照青汗兮入為肖子蘭膳粢兮
損麓協和言笑晏兮噢咻赤子不帛煖兮老而令終獲壽
箕兮遠近涕洟咸哀悅兮藏茲體魄鬱金裸兮馬鬣其封
表里開兮若斧若堂碑勿斷兮

候補教諭上官君墓誌銘

上官楚縣也春秋時蘭食采氏焉厥後派分光澤宋時均
為侍御史載書先後若拯若基若公裕若敦復若行若公

穎若公舉皆起家進士越六七百年衣冠儒業繁傳至十
幾葉其侶曰濬僂曰植旁治橋下治燦通隸鄉國學燦橋
出也植無子以燦為之後生子六次三曰曦字載升號寅
齋與兄弟地勤遠珣堃極友愛能承其家學以道義發為
文辭童試輒冠軍年二十七補郡博三十一食餼五十與
余同舉道光壬午科鄉貢曉揭余始識君於省寓見其文
章沉奧全學江右五家及余通籍君以與計偕得過從乙
未大挑教職未上主杭州書院講席學者頗問禮而善為
容性耿介尚廉謹不冒為濫交唯與同郡高雨農澍然張
怡亭紳最相得高張皆好古文辭而君則深於春秋採各

國事實屬辭為書又以家譜久湮增纂絲聯繩引俾覽者
得所承接凡宋以來先廬之頽壞者次第加封寔鳩邦人
葺城垣修學宮皆一呼輒應其抱也偉而不施之於大其
言也文而不顯其聲其尚也絅而不掩其光道光二十五
年六月二十日卒於家春秋七十有三娶黃氏子五懋本
道光乙未科進士刑部主事分發直隸知州懋忠從九品
懋蘭懋曾國學生出為塾後卜厝於某里之原塋用某月
某甲子先期其孤懋本以狀請於禮宜銘銘曰

弗撫而華勿綬而縈漠然以虛冲然以盈老於拙拙於明
循乎天之樂惟孝惟友不悖前喆之所行著書以節性涵

養以怡情澹焉泊焉與化俱冥有子能繼其志勿墜令名
家聲閭閻尚其世守先正典型

龍溪黃君墓誌銘

君諱宗源字學易號逸圃姓黃氏漳州龍溪人始祖貞菴
明初由漳浦遷是邑曾祖增生諱淑孕妣林氏祖監生諱
文揚妣王氏父乾隆己未科進士署清河道湖北黃州府
知府諱可潤妣鄭氏楊氏君楊出也兄弟七人序四君生
五歲而黃州君歿母鞠之襁褓時見家懸前母鄭太恭人
像詢之哭失聲每逢父忌日輒泣然淚下十歲復失恃於
是孤露益苦兄弟楚楚也比長銳志為學補弟子員不屑

為科舉文數上秋闈報罷乃力求用世之學教於鄉服則
與郡人士劇談風雅能詩能史能畫能書能棋能琴性好
施鄉大疫典衣裳為製丸藥以拒求者雖夜必起弗辭瘁
家故淡而為子延師不惜費授經而外諒文課賦不名一
家故其子之承之也亦詩亦史亦畫亦書亦棋亦琴人咸
謂弓冶之子世為箕裘道光七年正月二十六日疾卒年
六十有八以子貴

封儒林郎娶夫人鄭氏先卒子天球嘉慶癸酉科拔貢戶
部七品小京官開榮廣東試用縣丞其婿嘉興沈則可江
蘇候補知縣初長君服官戶部奉母諱去官服起供職迎

君就養至平和途次遭其喪遂扶柩歸越年葬於本邑泗
州東角山下廬其壙以俟能文者銘以薶諸幽既免喪復
就職未至都歿於是十有一年矣其次君將之任粵東瀕
行以其狀來請銘且云兄志也余慕君之為人而憫其遇
爰為之銘曰

生之艱遇之艱其志豪邁獨表表於人寰伯子才而天仲
子貧而官樹茲華表可以昭異乎靈山

龍溪黃母鄭氏墓誌銘

余既為龍溪邑附生贈戶部七品小京官黃君宗源誌墓
其孤開榮復以其夫人之壺述并家藏唐搢歐陽孝經一

冊牋而請曰吾母先先君卒前葬窀穸之事皆先君治之
弗及銘留幽坎誓以所藏帖乞能文者託以獻焉走數年
弗獲遇今竟棄養得藉大文以傳而吾母誌焉闕如敢承
先志敬以請余諗是帖為著錄家所僅見八百年物神光
呵護文弱何足以當固辭弗許乃續而為之識曰母鄭氏
夫宗源黃君同里人也父紹衣邑廩生祖笑山山西岢嵐
州知州母幼承家學慕曹大家之為人喜圖史習字師衛
夫人年二十而嫁無舅姑夫為黃州太守署清河道諱可
潤府君第四子世守清貧至是窘益奇家無臧獲廚竈井
臼母一切為之足於黻手於龜鄭氏幾忘其為刺史孫女

而黃氏幾忘其為觀察少婦也夫舌耕外出母以繇麻佐其家得二子課督甚嚴朝命入塾夜則置鐙几上課所授書至屈三商弗絕動引范文正公遺訓以為子孫式而於鄉先哲稱黃石齋先生出處大節懸其像朝夕肅拜數十年未得以肆力為學與朋友琴棋相往來至老死無內顧憂而子天球學文得父教學書得母教宮京師求字全集然人知有父之教之風而不知得於母教者甚力以嘉慶二十有三年六月某日疾卒年五十有六其塋以某年某月某甲子墓在本邑泗州金城之麓與夫墓東角山下咫尺相望子天球開榮婚沈則可官次皆詳贈君墓誌弗贅

系以銘曰

愉愉婦德玉佩鏘鳴無非無儀肅雍和平敬相夫子如輔
在車勤勞匪懈宜于厥家教子有方折蔓弗惜以善書名
是儀是式陶母能仁義姑能義式綜徽音德無弗備載過
荒原松楸猶存補此貞石以裕後昆

廣平府知府楊君墓誌銘

道光二十五年九月庚辰廣平府知府邵武楊君卒於京
第越明年其孤寶臣扶匱還將塋於杭旣除導持狀走泉
州來丐銘且曰父遺命也願紀實以薤諸幽伏念曩寓都
門與君交最善作文字譚輒至更闌旣又締以姻好故余

之識君為最晚而知君為最深於其卒也余往臨之但見遺書數簾一室灑如也益以是為君重按狀君諱兆璜字殫秋號古生系出關西先世明時以功授邵武指揮同知遂由江南占籍福建祖春秀妣李父瑛妣王皆以君貴贈如例君以乾隆四十三年八月丙戌生於從祖父鏡村先生蘇州府署中六歲入塾冠補弟子員以十三經注疏未卒讀不與省試好古文辭問字於學博吳清夫賢湘譽日馳應當道聘修臺灣志嘉慶戊辰舉於鄉已巳捷南宮目疾乞假卒未補

殿試 朝考入選奉

旨以知縣用授浙江金華令癸酉充同考官得士邱登等
八人時有汪生家禧文卷極幽奧公擊節賞之薦不售揭
曉後知經學士也浙人以是服君眼丙子循例薦升知府
越年選廣西柳州涖七月母諱去官先是郡有總麻服姪
毆其叔斃君訊確擬如法而巡撫某素不相能駁之獄興
天子遣使逮問事白坐某遣戍而君以上訐落職久之復
前官補直隸廣平府知府受篆執法如初屢忤上官意怒
欲致之罪患無辭焉五年竟以送部歸選遂引官去於戲
綜君為仕嶽嶽懷方不為苟且之施不為模稜之見其有
所便於民者則興之倡之於金華舳舻通濟而行旅以安

於武安濬水溢河而農田以利復建神祠於濬旁祀元太
史令郭若思示民知所敬式中歲挂冠十六載游彭蠡泛
龕赭陟嵩嶽登太行東踰甌粵北極燕薊足跡躡十四省
所在皆有吟咏晚就養春明丹鉛無暇席手校二十四史
凡祿代職官及輿地沿革縷縷能詳而於國朝掌故尤
瞭如指掌著有太霞山房詩集六卷梓行其餘文編存於
家未輯春秋六十有八娶夫人劉氏先卒子三中子寶臣
戶部郎中餘殤孫三人女孫一人許字余四男彥祿今以
道光某年某月某日卜壤於某所之阡與劉夫人合葬禮
也銘曰

兒若狂躬實敬直其方嚴其性平居屢慕子產之相鄭何
負經世之良才有志未竟顛葆歲華婁瀕於宮窅統為令
與為守成載口碑而循頌德政形諸激昂著諸哥詠其與
柳柳州宋廣平後先而侔盛

故翰林院編修湖南提督學政龔君墓誌銘

君龔氏諱維琳字承研號春溪先世宋資政殿大學士祀
名宦鄉賢曰茂良發祖莆陽元有以布衣平那兀納者曰
名安來泉編籍晉江累傳至君祖諱烈士舉丈夫子三伯
子元乾隆乙卯科舉人仲子大占季子懷清君仲出也季
早卒仲命君為季後幼與余同受學於伯父聰警絕人經

史多所涉獵誦西銘通書正蒙如流水照冠以郡試冠軍
補弟子員馳名黌序遂食餼嘉慶丙子中式副榜道光壬
午舉於鄉丙戌成進士選翰林院庶吉士己丑散館以
國書第一授編修旋充國史館纂修壬辰河南副考官
癸巳分教庶吉士是年大考翰詹雋高等蒙

恩賜緞復兼功臣館纂修清秘堂辦事本衙門撰文秋奉
命督學湖南君念楚省人文淵藪而欲拔真才必先清流
弊乃竭力釐剔法頗峻胥吏苦之歆蜚語試九郡事聞
上命刑部侍郎趙盛奎前往查辦廉得其狀凡所羅織皆
虛唯違例取刻詩賦頒諸士子墨譏落職去之日楚人士

泣以送同朝聞者咸為君惜而君灑然磊落雖當撼頓顛
覆之中志氣彌勵歸主講清源書院與諸士講求有用之
學規鋭為之一新未幾疾卒年四十有六時道光十有七
年夏四月五月初娶同邑柯氏繼娶福州李氏妾鍾氏子
七長丕謨廩生次丕超為胞弟維琛後蓋父命為其伯父
後者後其後三丕科附生餘幼學柯出者四李出者一鍾
出者二女二今以二十有八年春正月某甲子葬於南安
葵山水嚆之麓而以李宜人之壻埒焉余束髮受書卽契
心知既復同譜與共計偕通籍後習清書君日以十二
字母讀法舉相授其交之也深故其言之也質因擬其要

者存之係以銘曰

學其豐數其畝翻飛欲上戢厥翼其拓之賢士猶載德爰
伐貞珉以為後式

林母王氏墓誌銘代林太史鶚騰

母王氏林石潭司馬諱平侯淑配也卒之日其孤國華需
次都門聞赴星奔瀕行泣屬某必為銘幽之文薤有日矣
復郵書請紀實以為子孫式按母系出漳州龍溪人父天
台世儒也幼聰慧父愛為擇配無可與者適司馬以同里
來學一見奇之遂許字從遊有年貧弗能支辭隨父學賈
於臺之淡水廳冠乃歸畢昏父命代紀其業出而言曰官

不至二千石富不至千萬安足比人漢軍成豈欺我哉遂
承命遑家政一以母董之間歲或一返返之日問米鹽無
缺問事舅姑無缺於其居二喪也問視含殮兩無缺塋下
益專心計研用以施於國人粟為官出補廣西桂林府同
知判於潯令於來賓守於南甯柳州檄調絡繹七年五遷
母皆弗隨於是息亦稍長矣郵問教訓玉成迄無缺尋解
組歸居淡水卽於其地廣治田建永澤堂於本籍龍溪以
穀三千卹族人每歲自臺輓粟至其堂卸母部署畫一復
念饑有食矣而寒無衣設棉花局以並濟道光丙申京賑
發粟數千斛運於析木之津辛丑臺民弗用靈捐緡萬緡

充軍餉

天子懋乃績晉加道銜復增秩三品

封母為淑人其子獎賚有差皆司馬之力也而母與有助
焉司馬歿教訓子婦如初拒卹窮貧如初人每呼之為東
海萬石道光二十八年八月某甲子疾卒春秋八十有二
子三國仁附生先卒國華候補道國芳候選郎中越明年
某月某甲子薨於龍溪某所之阡銘曰

其福袞袞其積隆隆九族待其鋪調卹微至而不以為功
凡得其施者各額誦而銘於其衷宜階下濟濟虹雲羽而
耀以繡豸與花驄

黃李府君墓誌銘

春秋書莒人滅鄆旨最嚴治萬世宗法黃李府君者其先
本文山明進士及第黃尚書諱鳳翔文簡公之裔也父士
貴家貧府君生二歲而孤從母鞠於安溪李文貞公故相
國族派宗儼家中宗儼喜幼愛之甚長得之甚為飲食教
誨冠婚築室以居之治田以養之命為子得專財既成立
律當歸宗府君念李氏恩不忍忘而黃又無大功之親歸
李則本夫之祀絕歸黃則鞠育之義乖乃加黃於李之上
示不忘本喪服繼父同居者服齊衰期異居則服齊衰三
月子夏傳之曰必嘗同居然後為異居未嘗同居則不為

異居同居者必以其貨財為之築宮室歲時使之祀焉如是則恩厚恩厚故以朞報神不歆非族小記有主後者為異居若無主後而同居則亦但以其恩服之服者服其私服禮不得為後喪服又曰父卒母嫁從為之服朞從者從而寄育也服朞亦私服若為父後者則為出母無服既不_而得服所出之母又安得後所繼之父仁人不過乎物孝子不過乎物為之服朞不亦可乎雖然黃得李專財為居室李復為之築室存祀黃氏之有後乃李立之也黃有後而李無後於心何安且既許為子矣忽又奪之祀其咎甚於不仁故存李以恩掩義宗黃以義掩恩不滅黃自不滅李

公羊傳曰反於經然後為權雖亡於禮者之禮而其不失宗道君子猶避之吾泉元時有楊相孫者本董姓後隨母嫁從楊為董楊氏今其子孫昌盛科第不絕事載郡志知古有先我而行之者則亦禮以義起之謂也府君諱承祖之字淵美一曰孫美從李家昆仲行也觀其名與字可以知其志矣以道光二十六年疾卒年六十有八娶楊氏子四善登監生嘉猷嘉履光照殤女二婿蕭維芳林玉佩皆縣學生越明年十月某甲子薨於晉江紫帽嶺口鄉之麓爰考禮以紀其實正其誼而為之銘曰

幼遭孤露從母寄養與之適人恩如挾纊長代操贏會計

悉當服以齊衰禮隆殯葬自李歸黃益增悽愴芳草萋萋
登高而望松楸猶存先人冢上由禰溯曾次第修葺不忘
孝思兼承七塋為李建祠獨營心匠以續兩家門高閼閼
為今董揚為古肝向泉有紫雲鼎力提倡傾貲重修以供
佛藏種德於鄉福祿其兼蘭階有茁青雲盎盎用別派潢
藏諸幽壙

張母王氏墓誌銘

晉江法石里累贈奉直大夫張君諱和平之妻曰王氏同
里人也以子貴贈安人復以孫貴晉宜人年幾十有幾道
光某年某月某甲子疾卒咸豐二年某月某甲子葬於其

邑之某鄉某原宜人之考諱文德娶某氏女夫婦皆有善行宜人受教於始筭從事於既嫁知疾苦能食貧無戚戚於所無及贈君懋貨海東既富無訢訢於所有羨則散給四從六嫺無拂拂於其所仰所告操作勤勞自始於為女中於為婦終於為母顛若一卒之日子婦哭戚鄰哭臧獲哭外至窮嫠老嫗哭皆失聲有子五人曰正琛國學生曰正瑞考職州同曰正心曰世擬曰長壽女二適陳林孫十八人葬時正瑞以下皆已死其孫議叙同知銜鴻祥道光丙午科副榜內閣中書鴻達謀於伯父正琛具宜人之壺範來請銘余締交也弟獲辭乃為之銘曰

女有圖史傳師氏兮禮宗為則能種德兮作宅新原維孝
孫兮納銘幽扃永淑聲兮

勅授武信都尉楊君墓誌銘

仙遊四面環山奇氣豪邁之士往往出乎其間其世累潛
德發而益光者關以南香田里楊氏明定遠將軍南山始
來在此居也數傳至武信都尉諱高標字章霞號文慈席
先業以武起家其父贈君發桂好行其德鄉里稱善君序
長少而恂謹善事母蔡太宜人每見贈君有所施與輒慙
懇勸成長喜韜鈴習騎射射輒冠與季同試於澤宮齊名
采藻嘉慶庚申秋校經劉中式魁選彌勵志都試未及上

越年辛酉十二月十九日疾卒春秋二十有七娶蘇恭人子一萬選州同知孫三其次繼勲以鹽提舉薦升員外郎君初贈奉直大夫從子官繼晉中憲大夫從孫官嗚呼以君慷慨厚施助父樂成宜及身而貴乃降年弗永遲之又久始克顯於其子復遲之又久乃克顯於其孫報應遲速固有時哉抑山川靈淑之氣固將厚其所鍾以大為鬱勃耶先是權厝洋坪村牛鼻山道光戊申十月某甲子繼勲奉君柩禮葬於本邑梅山之麓虛右窆以為蘇恭人百歲相莊禮宜銘銘曰

繫偉哀之瓌琦兮識豹龍之韜畧
羌負志其惆悵兮秋獲

隼手雕鶚胡壽齡之已促兮忽跨雲中之鶴幸蘭桂其留
馨兮誦清芬之繼作偉五花之神誥兮綬纍纍而若若轟
山岳其儻徊兮抱靈氣以盤礴世世長子孫兮蔚蟬聯而
雀躍

誥贈中憲大夫楊君墓誌銘

君楊氏諱萬選字華晚號青亭世籍漳州明定遠將軍曰
南山始遷僊遊居香田之楊坪村族以大曾祖子雲祖發
桂監生贈奉直大夫父高標嘉慶庚申科武舉贈如祖君
生八歲而孤撫於母蘇宜人時祖父母皆在君出就傳入
隨母奉事日致勤比喪殮葬皆以禮壯念先世遺產浩大

弗能負薪遂輟儒習計倪然性豪邁不屑較錙銖唯勉
務為善訓其家人曰古君子所以能成其家者皆由能樂
其善也而樂善莫便於濟人鄉鄰聚族而居者戶以百計
無吉凶無緩急無老弱鰥寡造其門皆量給之莫虛願以
去族中無祭田廣所萊以為公產興郡試院仙邑學宮金
石書院舉大工身先提倡助成無慮數千緡凡道路橋梁
庠觀寺宇或補舊或興新或專修或合作因時以制急於
其公尤明於其義初近村有暴者負嵎為虐攘敗財穀婦
女官聞之莫誰何君乃竭力請於縣中大府衛弁會辦復
捐緡二千作先牛十二犒師衆皆為之用至鄉無秋毫犯

既而首惡就禽患遂絕鄉黨皆謂君之見遠者大者故
不避嫌怨以安于而鄉保于而國性喜談古今事蹟以勸
來者人有忿爭悉為排解為母氏額請

旌表建坊於其里又以祖父勞勩數十年弗獲貴顯乃入
粟為官以州同

贈封如其秩卒道光二十一年二月丁巳年四十有八易
簀時以母在弗克畢養長跼號呼聞者惻然初配蔡恭人
繼配曾恭人側室朱氏子三長國經先卒次繼勲候選員
外郎皆蔡出三鎬出曾恭人子之君以子貴晉中憲大夫
道光二十八年九月甲午與蔡恭人合葬於慈孝里大帽

山之麓虛其右以為曾恭人百歲後之藏銘曰

世承家業勿墮前徽肇牽服賈入事慈闈家崇儉樸弗尚
珠璣拒窮卹寡推食解衣補棘為院造石為碣禁非曰義
怨是用希山岳環峙挹翠拱輝珣岑蘭錡得所憑依天相
令德蔭厥芳菲有子負荷魚佩紫紱令名弗辱報稱庶幾
敬瞻堂斧豐碣巍巍

南安府知府李君墓誌銘

四川威遠古南安地也有賢邑宰曰李君諱書耀字亮茂
號懷庭福建南安人由宰而守復選南安人甚奇之生閩
南安也宰蜀南安也守江右南安也地不相襲而出入壹

以是為緣則其生之有自來耶世居安溪石壁遷今邑之
長涓復遷彭口祖登魁附學生父芝乾隆戊午科副榜君
少受學於其父弗就外傳與兄廣文書爍砥礪為業在饒
試輒頡頏冠軍一時瑜亮辛卯舉於鄉壬辰與余同譜成
進士釋褐以知縣分發四川假歸省母居三年出為令補
威遠到數數問疾苦舉利病皆畧有先知民曰直如吾南
安人也君曰我固真南安人也凡所平反皆允九年弗移
篆兩校鄉闈瓜期而往得廉以封其父母若祖父母尋內
粟增秩選江西南安府知府其地距蜀南安自西千里而
遙距閩南安自南千里而遙風土雖不同而民情抑又近

馬牒下人以為賀君獨感然有憂色曰母老矣恐弗及事也蓋昔夢神人有示以南安當其界之語遂自京引疾歸來諗左右唯謹越三年卒於家年四十有七實道光丁未八月二日也母蘇黃贈封皆恭人君黃出也娶鄭氏子三慶霖慶麟慶薌女一以咸豐三年八月某甲子薨於南安某所之原前事其孤以狀來丐銘爰叙其次如右復為之銘曰

其人樸而誠其性和而介為縣為郡仍不出南安之界半祐有碑馬援有誡凜然法守猶存宜其稟之行而勿懈誥授奉直大夫州同知張君墓誌銘

君諱正瑞嘉慶戊午辰在酉生月也道光庚戌辰在子卒
月也年五十有三生於泉卒於臺既卒之明年咸豐紀元
其喪自淡水歸又明年某月某甲子葬於其所家晉江縣
某里某原字文輝號儀庭姓張氏先世居鑑湖由沿塘再
遷法石父諱和平初貧懋遷赤嵌得計研術盡學焉因以
大其家君隨父學賈又能善法其所為每歲數數東渡挂
席於煙波浩渺之區在臺遇有義舉必身先倡率戊申歲
饑議賑粟君傾橐不下數千緡以濟泉郡尊經閣圯亦捐
橐千緡俾克蒞事商待賈不計數農待耕不計數工人待
稅不計數乃年未大而歿特舉火者咸哀之君以考職州

同晉授奉直大夫母王太宜人娶何氏妾戴陳許子七鴻
祥議叙五品銜鴻達丙午科副榜內閣中書鴻進業儒卒
鴻猷鴻慶鴻福鴻章皆幼也女二長適陳次許蔡君之子
鴻祥與余子彥麟為聯姻而次為鴻達嘗學於余者也故
銘之銘曰

承厥業能繼起遇義為力獨矢琢斯珉善厥紀

戶部員外郎丁君墓誌銘

咸豐元年九月乙亥戶部江南司員外郎丁君卒於官越
年某月某日墓某所之阡前墓其孤次君之官氏邑里與
其功行之實為狀使告於慶鏞為銘慶鏞曰君余故交也

然以余謏陋何足為文辭弗獲命乃為之誌其墓而銘之
其叙曰君諱彥傳字範亭號角垞晚更畏齋河南永城人
也祖德馨妣氏縱以童節旌本生祖德承妣氏縱父釗妣
氏郝皆以君貴贈如例君生十月喪父母撫之少穎異道
光八年戊子以優貢領鄉薦己丑成進士選翰林院庶吉
士充

武英殿協修母喪去癸巳散館改主事籤分工部屯田司
壬寅選戶部四川司主事甲辰分校禮闈庚戌遷今職君
為人恭遜質樸確守儒先格語嘗取宋臣言行錄及周張
程朱諸書手錄成帙為日記持行躬躬如也及施於為政

以謹法能廉聞所與遊者多愛敬久而益服官戶曹會銀庫案發監追者獄幾滿君白大吏上其事請釋放以緡多寡定為限事下卒從君所白凡知必言不肯稍涉依違以故上官多器之今

上卽位用壽陽祁相公竊藻薦

召對乾清宮長白賽尚阿督師粵西約隨行先面議方略甚悉嗣以疾作弗克往其為當世所知如此生平尚誼氣京居聞房師吏部毛君鼎亨耗作家無以葬遂卽日請假南行醵金營之故友房叙五李誠貴死於路為拮据歸其喪師友之教古人無以過也初余通籍以與君同習

國書識最早從賃屋於京城東食同爨業同師屢見君拔
劍起舞意氣灑如乃未竟其志而遽歸道山是可哀也君
年五十一娶縱蒸人妾梁氏子二曰方來曰方至女二許
字餘姚朱少詹蘭子惠然商邱陳給事壇子錫綸其銘曰
君性溫溫道義自持及其臨事不冒苟隨同朝之士相與
推之軍國之大相與咨之取友必正在官無疵子孫承式
請眎銘詞

誥授通議大夫致仕光祿寺少卿卞君墓誌銘

致仕光祿寺少卿卞君諱斌卒於家其孤乃銑以君之喪
葬某縣某原前期因其戚姚君承興郵狀京師以幣乞銘

於晉江陳慶鏞余未識君竊聞其所治經若易若書若說文心焉企之及觀其為政則又與古人之出處輒相合且重以姚君之請知其取友端其言可信君歿秣中外三十餘年為吏去觚角絀雕琢然於義所在必侃以爭故總匯西曹平反多賴以治出知常州有疑獄懸之久矣前官莫得其狀君至鞠之伏遂發歲旱督濬洪濟河石塘灣咸墅壩廨丹陽以下諸水皆通饑請帑發賑并捐廉為倡得活者一百二十餘萬人按戶勾稽輒當所屬邑武進陽湖額徵多有稅無田君上其事請豁并核減桑棗幾緡二千有奇人稱惠紅教興念渠而外皆不治人稱慈俗尚五聖祠

國若狂無敢問者君命毀為民居人稱勇權蘇州五閱月而清釐者四百餘訟人稱公與明遷廣西左江道甫蒞篆卽陳情歸常之人聞之宣樂導扁至其家往來跪候不絕道八年養畢復之粵如其任未卽蒙奉權釐政綱畢治到左江適越南內訌震動我邊邑搖惑我民人防彌有階石四竟為之帖然西隆貞豐師宗數衝道賊起為踞聞息星行棄治吞舟之魚得無漏網署梧州南甯各郡事其剗斷視蘇州其興除視常州攝陳果事值夷氛告警督理郵政甌脫皆無塵

天子廩其材遷內卿未上病羸乞骸骨歸主講紫陽書院

時復留心民瘼遇水溢倡議捐賑蘇大小村鎮一萬二千餘戶口桑梓蒙其庥余觀史書所載朱邑治桐鄉龔遂治渤海人數事已足稱道君之事多矣其與相似否必有能辨之者而其所學又多能發明前哲解易乾用九為乾體坤用卽繫辭取諸乾坤者是坤用六為坤體乾用卽禮運吾得坤乾者是書六宗為殷周方明九江為南江其說皆精至說文一書詣力獨瘁據叙目引經皆古文疑叙以篆文合諸古籀乃後世羈入語書中正文引經者正字卽古文雖附有古文不足信重文引經者重文卽古文雖先以正字不足疑如韋革部首皆秦篆非古文冠牡重文皆古

文並非篆籀劇从古文銳不應以劇為是籀非古人部多
古文不應以人為非古是籀皆近時段桂諸家所未辨者
而能辨之經餘復兼及天文五行壬遁醫筮堪輿於經有
易經通解三卷尚書集解三十卷論語經說二卷小箋二
十卷樂經補說二卷於小學有說文箋正十六卷合叙例
為二十卷七經古文考一卷聲律二卷集古文字畧五卷
於雜家有緯雅三卷粵西風物略二卷刻鵲集三卷卞氏
宗譜十一卷外復有詩文賦若干卷梓者行於世未梓存
於家君字叔均號雅堂其先濟陽人今為浙江歸安人曾
祖宗洛祖榮光考期元皆以君貴贈封如其官君弱冠以

古學受知阮文達公補弟子員嘉慶戊午舉於鄉辛酉成
進士改主事籤分刑部充提牢廳補山東司主事奉天司
員外郎江西司郎中出為江蘇常州府知府轉廣西左江
道擢光祿寺少卿其署篆於府則蘇之蘇州粵之梧州南
甯於道則廣西之鹽法右江之兵備在粵三署按察使一
署布政使前兩充同考官一丁卯順天鄉試一己巳會試
退隱凡十年以道光三十年八月初二日卒年七十有三
母孫氏贈淑人三娶車章孫側室胡子四曰乃銑增監生
車出曰乃譚廉貢生候選知縣曰乃謹附生廣西試用從
九品嗣從弟五辰為後皆章出曰乃詢附生孫出女三嫁

監生烏程方圻候選訓導海甯陸世杰浙江候補從九品
江甯楊時和君墓於卒後明年是為咸豐元年某月某甲
子銘曰

幼而聰天性粹也老而勤六書邃也出而仕於朝職屨位
也退而隱於家澤下洎也於古循吏當無異也抑曰文苑
尚或類也銘而存之備史誌也

誥封中憲大夫江西撫州府知府陝西綏德直隸州學正
丁君墓誌銘

咸甯丁芑詒將塋其父而以母夫人附焉郵書乞銘於掌
陝西道監察御史陳慶鏞曰吾先世出自齊丁公冢於齊

載族姓書宋南渡時自齊遷浙上虞復之會稽傳五世而
吾祖也辭親問學關中習申韓遊幕府遂就咸寧居焉繼
世而吾父也為綏德學博始吾父登嘉慶癸酉拔萃科中
式丙子舉人道光乙未會試畢以挑教授職未補署長武
三水朝邑郃陽諸學篆尋卽真甘肅靈州學正乞養去事
竣選陝西綏德直隸州學正所至與諸士講求音律故士
之能不失諧聲者賴以倡扶滿嘗最其列薦知縣離監試
宏道主講岐山學古各書院所獎拔多知名性質樸不喜
外飾衣服飲食遵儒約至人有急隨量子之無錙銖旣老
治其家事不肯懈曰吾以受先人之所付也處其子孫不

以逸曰所以使汝知民生之疾苦也咸豐元年十月二十八日終於家年六十有九娶吾母山陰陳氏女也外祖諱學章為浙宿學母幼受教歸處家道皆宜治甘旨有體吾祖父嘗曰婦之事我也如吾子吾祖母朱太恭人年八旬亦曰婦之事我也如吾女前後居二喪克盡其哀自吾父為學為官門內均賴經理吾兄弟悉資以教初迎養江右氣體如常無何疾作遂不起殯撫州官署年六十有六實吾父卒之年八月十六日也芑詒荀延殘喘扶匱次潼關始悉父耗弗數旬連遭大故百身莫贖今將以咸豐三年某月某甲子合葬咸寧之某鄉某原願乞銘以圖長存余

曰為仕能訓是善類之甄也居家能勤是義方之式也而
復得夫人善相其德內外稱治是可銘也君諱家俊字蘭
墅號星槎始編陝西國子監生諱樹方實考前隸浙江會
嵇廩生諱鵬飛實祖子男四人芑詒道光壬辰進士江西
撫州府知府蓋修廩貢生候選訓導芾存議叙從九品茂
承吏員女一嫁整厓厓生路慎舉君授修職郎以子貴
覃恩晉中憲大夫夫人初受封於其夫繼受封於其子

誥如式銘曰

丁公肇齊封土建功保世滋大啓慶自躬遷淞洎秦厥緒
靡忒逮及君身司鐸綏德音律以諧用式多士丕變文風

化深梓里慊慊為人勉勉為官立身治行功德具完淑哉
夫人集享家慶來嬪丁宗作德維令貽謀式穀子實以成
出守江右能振家聲維此懿美孰可無述刻辭幽宮以誌
不沒

誥贈資政大夫內閣學士兼禮部侍郎銜海甯州學正餘
姚朱公墓誌銘

今上咸豐二年祀明堂推恩羣臣內閣學士兼禮部侍郎
銜朱君得以其父故海甯學博晉資政大夫十一月乞假
養母瀕行持尊公行狀來請銘慶鏞不能文何足道揚盛
美然以閣部之請益力弗敢辭且知其家世淵源所由來

者遠謹案狀而次之敘曰公諱文治字詩南號少僊家餘姚其先系出南陽漢尚書僕射暉之後宋初明州錄事參軍端由瑯琊徙鄞至熙寧間兵部尚書廷碧始遷姚故今為餘姚人累傳忠孝其最著者曰德辰曰端祀忠義祠曰守道祀鄉賢祠

清興有剡肱救父者諱昂公高祖也數姚江四達者諱承勳公曾祖也煮粥拒貧者諱玉堂公祖也割臂療母者諱金鐸公考也自祖以下皆以公之子貴贈如階公登乾隆戊申科舉人以詩名噪浙東為錢竹汀大昕盧抱經文昭邵二雲晉涵三經師所賞拔入都復與吳穀人錫麒張若

山間陶劉芙初嗣綰宋确山世犖數君子聯詩社一時稱
盛四上春官不第辟縣尹不就出補海寧州學正值水溢
奉檄辦賑硤石災黎無失所州號文藪公至脩學宮前後
殿廡及尊經閣濬泮池甃石自是而風益振焉嘉慶丁卯
秋大比浙省雨甚士子入闈蹂躪受傷許無如何公啟點
次之法大吏難之卒如公言無恙久之以最上

旨俞甲戌秋旱有無賴子數千嘯聚袁花鎮公聞請案治
境以安復以最上報如前

旨在官十九年與諸士聯絡倡詠如契所歡去之日士思
之勒宦蹟於石抵家訂詩於饒竹山房訂文於鐵簫樓復

以詩筒作投桃報李子既貴仍安儒素不徇於浮夸之習
不涉於外事之交然至濟人所在則憇憇先之道光壬辰
浙西歲歉白郡守開常平倉活者無算癸卯重遊泮水人
謂公之積厚而光其自得者壽考見於身其有餘者德澤
見於後故其年至於八十矍鑠如常而有子能大其門如
是性篤宗系奉本支二十世主祐合祭名曰追遠輯宗譜
以聯子姓凡族屬之無主後者建義產以祀初公有姑嫁
於沈而寡依母家食公生五歲失恃賴撫之及終喪之如
母復以節孝請於

朝蓋其純孝所推自高曾以來未之有改也卒年八十有

六道光乙巳二月七日也娶陳夫人同邑兆梅女繼娶陸
夫人平湖庠生璋女子二森嘉慶己卯科舉人貽贈詹事
府少詹事先公卒薨卽閣部也道光己丑科一甲第三名
進士翰林院編修廣東正考官湖北學政累遷至今職皆
陳出女六適貢生姜懋運丁未科進士吳應寬者陳出也
適庠生毛賢鎬庠生方來候選布政司理問葉元墾乙未
科舉人范多饒者陸出也公葬桐岳湖之阡將刻石以誌
諸幽禮宜銘銘曰
有以充其行克遐者壽有以善其家克昌者後其詩皆至
性所流而莫能出其右宜乎

綸音疊貫載錫之光丕承世澤長發其祥後之來者見若
斧見若坊見若堂其敬式斯珉之所藏

稿經堂類藁卷第二十三

晉江陳慶鏞頌南撰

墓誌銘

誥授榮祿大夫工部左侍郎沈公墓志銘

公諱維鏞字子與一字鼎甫號小湖浙江嘉興人曾祖暉
妣于祖廷煌妣諸父學階妣陳皆以公貴贈如例公兄弟
二序長少從父學不名別師毀齒經傳卽成誦年十七補
弟子員旋奉母諱讀禮畢補增廣生嘉慶辛酉舉於鄉壬
戌成進士改庶吉士於是年二十五矣以疾故乞假未至
聞父喪奔歸服除乙丑散館授編修辛未會試同考官壬

申翰詹大考

記名遇缺題奏癸酉順天鄉試同考官乙亥除國子監司
業旋遷司經局洗馬丙子湖北學政丁丑擢翰林院侍講
轉侍讀庚辰差竣入都官如故道光辛巳補翰林院侍講
學士壬午福建正考官尋拜福建學政是年轉侍讀學士
癸未補大理寺少卿丙戌差竣入都官如故八月放順天
學政庚寅授太僕寺卿辛卯授宗人府府丞是冬差竣入
都署都察院左副都御史壬辰拜真除八月復放安徽學
政甲午期滿仍留任其冬進工部左侍郎丁酉差竣道上
額請開缺回籍營葬奉

旨賞假三個月毋庸開缺戔戔以兩耳重聽乞休不允尋署錢法堂事務六月

上察耳疾加甚

諭開缺安心調理一俟痊愈卽行具摺請安欽此於戲綜公為仕凡三十七年由文學侍從洊升卿貳仰荷

兩朝知遇入則屢與修書出則疊膺文柄星使絡繹同朝諸臣無有如公多者其在

仁宗朝奉

特旨輯全唐文纂

西巡盛典分辯一統志臣工列傳復奉入直

懋勤殿纂辦

祕殿珠林

石渠寶笈書成

賜賚有差其在

宣宗朝

特派總纂

實錄兼提調并

命詣

皇史宬恭查

尊卑得如式以報書成亦

賜賚有差先後充

文穎館

國史館協修各一

國史館總纂一

文淵閣校理二

日講起居注官一分敎庶吉士二稽古覺羅學幫辦內閣
學士批本各一閱新貢士覆試卷庶吉士散館卷各二閱
新進士

朝考卷考試試差卷

殿試讀卷大臣各一而五任學政兩逢拔萃尤學臣中不

可多得之數所至風清弊剔振拔皆知名校士而外兼留心民瘼視湖北首禁邪教士氣一新視福建

奏飭州縣官毋私設班館毋以監生任緝捕催科諸政視順天尤以畿輔重地體察民隱時或入牘以告視安徽值濱江各郡水潦成災與撫藩分籌備賑復捐廉佐事民以安公為人極和易至其舞文勸法無少縱而劣員較轡庠序及奸民藉端傾陷士類必力持以直之故今楚閩燕皖士民無論知與不知聞其名皆矜式生平喜讀宋五子書以為典章制度與夫聲音訓詁文字之學必宗漢人而道理則備於程朱自明薛敬軒胡敬齋以及

國朝陸稼書諸書靡不沈潛玩索求為身心有用之學所
校刊有程畏齋讀書日程羅整菴困知記祝人齋淑艾錄
汪雙池讀近思錄張楊園年譜陳確菴聖學入門陸桴亭
思辨錄方小春讀易日識最後訂姚文僖公古音譜序其
書讀與唐韻合然則公之志向與其誘進後學蓋可知矣
慶鏞久隸門牆當公養疴京邸得造膝請業嘗曰為學當
從實踐下工夫又曰居官須熟讀通鑑確礪益至丙午慶
鏞鐫秩回籍公惓惓不忍舍瀕行復贈以詩而公亦以是
年南旋越已百主講敷文敬業兩書院時浙江水忽漲禾
被淹十八九公札商當道輓粟飛芻其言凱以詳事未竣

遽以是夏六月二十七日疾卒於家年七十二遠近相與悼之邦人士以狀上得

旨崇祀鄉賢祠而吾閩自林文忠公則徐出公門下而外暨諸後進並以名宦請疏具未上蓋公之明德固在人也初娶顧夫人元和國子監生有篁女嘉慶十七年卒繼娶虞夫人金壇盤屋縣丞書寶女道光二十五年卒子二長宗涵刑部司務次宗濟監生女四殤者二一適甲辰進士工部主事李德我一未字皆虞出今以咸豐元年某月某日塋公於某所之阡移兩夫人之殯附焉前事長公子具狀來請銘慶端文弱無能道揚盛美然以受知於公也深

人安敢以無質之言重為公知人累謹序其次涕而為之
銘曰

大篤哲人生于樛率文學起家以佐

天子屢持英蕩振興斯文匪惟造士抑孔勤民誠格

兩朝特隆

帝眷稽古之榮

賜書

賜膳立身衛道先民是趨一生私淑維程與朱爰伐貞珉
以紀名德必有達者善繼無極

介休馬君墓誌銘代陳給諫壇

山西馬氏世宦也自始祖翥居介休十傳至浙江鹽運使
曰鍾華績載遼越記畧運使子洪珩江西督糧道糧道子
楠刑部郎中郎中子思江南布政使司理問理問兩娶皆
張氏子三其季曰季筠府君諱書奎字婁左幼隨父之京
師遂籍焉於是編宛平道光乙酉以優薦貢明經考選鑲
白旗滿洲官學教習戊子中式順天舉人教習期滿補龍
門縣教諭教諭期滿薦舉知縣未選以子官晉朝議大夫
國子監司業年五十七疾卒於長子官舍萊蕪實咸豐元
年四月乙亥也府君初成童父母皆喪與兄書勛登書友
愛甚摯自肆力為學有文名長能詩工楷篆古碑搜羅頗

富禮闈十數上弗第弗情其恪為教習能陶士類為教諭
能振文風學者慕之捐廉修學宮凡一切禮器準以式官
雖小法未嘗不慎念子姓支繁派衍譜久泯乃積十餘年
力叙為書繪圖以頒諸宗屬之散處遠方者昭穆以齒馬
之先麻官內外然皆發跡于庠至府君以乙科子以甲科
君子謂保世能滋大焉娶何恭人息二鎔道光乙未舉人
山東萊蕪縣知縣鑄庚子進士國子監司業女一嫁肅甯
縣教諭大興劉銓福茲以卒之明年三月某甲子塋鎮西
里屯村之瑞柏原其孤以余為世交屬誌墓因叙次如右
復系以銘曰

馬氏大家世有顯人淑行碩德克施于身司學八旗循循善誘出膺鐸教以義為守敦族睦宗譜牒以叙爰大子孫永承厥緒維墓有域其藏有石示此銘詩久而勿斁

陳江蔡孺人墓誌銘

孺人姓蔡氏晉江靈慈里人文林郎晉奉直大夫諱時聯女而嘉慶己卯科進士河南即用縣知縣諱鵬南女兄也嫁同邑陳氏為余族故儒士諱宗經字士直之妻為人柔嫺靜閑在父母家至歸于夫氏本於自修而卒於能宜其家儒士世居陳江與余五世分爨後遷泉南關外聚漳里家故貧至考諱凌霄始學費得稍康孺人及拜其舅與其

姑經理家政凡有所入區畫咸宜養事而外常以其餘為散贍以其故族鄙親疏无有惡數儒士為學數數雖鳴戒旦鹽豉之事弗以聞以其故儒士得專精於業習經解是非頗不謬惜弗遇中道而亡遭喪哀毀盡禮畢課子讀父書勉益力晚而子復卒尋以課之孫孺人之惓惓懇懇以毋忘夫之手澤雖未及身而報而有以知其後之必昌也年七十卒咸豐四年八月辛亥其葬以十月丙辰實卒之六十六日也墓在清源水流坑太嘉山麓前期其孫祥雲口述壺範泣請銘余於儒士為昆仲行故銘之有子二人曰錫康先卒曰德靜孫四人曰祥雲監生以軍功議叙八

品曰重友曰重厚曰重宴曾孫三人自子以下其長者尚不失家法幼者頭角岐嶷蓋孺人之教之澤也銘曰

世守青箱實操德教來嬪于陳慈以止孝秉節相夫能辯
龍豹賙卹六嫔錙銖不較薦俎以繁酌尊以醇牖下尸齋
肅恭其貌於古女箴是則是儆黃卷一鐙念典學敷詒厥
孫謀雀躍騰趲刻此銘辭藏諸幽窆

族子朝光母蔡宜人墓誌銘

族子朝光母蔡宜人卒將塋泣請於余曰母事先君子垂
六十年代吾嫡母操井臼治米鹽凌雜諸政凡吾兄弟之
能勝衣者未能勝衣者衣裳垢請澣衣裳裂絰箴請補箴

婚者嫁者為之治絲麻衣履以御之勤勞一以身先遭其喪呼痛擗踊如失所親生吾兄弟二人督繩弗使逸性儉約於紛華盛麗之為悉除去待子婦嫡子婦色和而氣仁諄諄共勉所善先君歿年八十七矣母亦行年七十二於其病也晝夜省候未嘗離藥石非親調弗以進卒慟而復甦居族黨長幼親疏咸宜今音容不可復接矣墓有日願以其實者銘諸幽案宜人姓蔡氏晉江人與其夫君奉直大夫候選州同陳君聲著同里曩余西席其家戶外不聞詬誶聲既而遷郡城以同系家相往來詢諸衆子及其從祖昆弟從父昆弟以下皆如朝光言所尤難者始終自執

箕帚未嘗干嫡正之倫禮國君不再娶夫人卒娣升於嫡其嫡死不更立者祭宗廟則攝焉夫先王之制一而已矣何以或升於嫡或不升於嫡蓋媵之未及事女君者得為夫人如聘嫡未往而死媵繼往是也白虎通所謂立其娣尊大國也媵之及事女君者不得為夫人如元妃死次妃稱繼室是也白虎通所謂明無二嫡防篡殺也宜人及事女君例不得升於嫡祇可攝宗廟之祭雖然宜人非娣姪也蓋又質之於禮焉古者大夫士皆媵娣姪大夫為貴妾總此娣姪也士要有子則為之總此不必娣姪而視娣姪也宜人既非娣姪又有子子之子又成名其正嫡已死則

亦可升於嫡者歟自春秋時以妾為夫人皆其君夫人之
而外或弗夫人焉然溯其端實由妾之自僭始宜人之不
敢升於嫡至死猶以必避正寢為辭蓋以為失乎禮之實
而求榮不若安於禮之常而去辱於以成其夫之賢而為
子若孫之令式此名之所以正家道之所以齊也春秋著
妾母之辭二曰惠公仲子曰僖公成風子穀梁子謂母以
繫子皆夫子特筆所以立天下後世妾母大防今冠以子
名正其義也亦以成宜人之志也稱宜人者母以子貴成
禮葬也春秋顧於其葬也而小君之宜人有子二曰朝光
議叙州同曰璵玙前卒女一嫁王氏孫八人兆鳳附貢生

曾孫三人年七十六以咸豐甲寅六月某日卒塋以明年
四月某日墓在晉江廿四都某所之原初奉直君娶周宜
人生子四曰奎光福清訓導曰澄輝衛千總銜曰瑛質前
卒曰玉光國子監生皆宜人督成之故諸子之視之也如
因母銘曰

戶樞一蠹不可窺唯循於禮能已僭退處姪娣屏華贍謙
而能光溢門閭副挽鹿車老且耆絰鍼補綴日有儼春露
盎盎覆以覽兒子牽衣復舞幃翁斯有羽是左薇蔚為女
宗家之鑑湖山鬱勃水激澗刻石其幽世永念

陳母張孺人墓誌銘

曰建育嬰堂闔泉僉曰難而陳生文波毅然獨以為易余因見而題之命赴局司事果如其言行尋遠賈淞江越三年奉母諱歸余亦以團練回籍文波次其母之壺畧跪而請曰曩者育嬰堂寄乳之法皆吾母言之不孝見不及此也今逝矣屬纊猶諄諄飭以舉莫敢廢言猶在耳而謦歔弗復聞矣敢乞言以銘諸幽余俞其請而為之叙曰孺人張氏晉江人系出鑑湖嫁同邑梅坑族裔陳君諱世潤為配歸事舅姑母失於孝理家政躬勞苦母失於勤得怠督繩不倦母失於教凡力之所能及者必勗其子迅而行行而必成泉械關動連數十鄉命長子文波下莊勸導事多

濟三子祥光從事戎行亦多以擒獲立功得叙隼人皆謂
有是母乃有是子其他有善必為大都與育嬰之建同功
處四從六嫗皆以恩接慈惠之稱內外如一是則可銘已
年六十以咸豐壬子十二月某甲子卒越明年某月某甲
子塋於本邑冷水井鄉西山石下之麓子三文波監生文
繡出繼世父沂為後祥光候補外委女一適張高儒銘曰
淑哉張氏潁川之佐洵直且仁恪恭匪惰薦以蘋蘩釀以
秬稷牖下尸齋拜而勿箋操作勤劬猶蟻於磨御下以慈
善督善課積德之祥甘露盈箇美厥芳徽允堪揚播

麗水縣知縣李君淑配陳氏墓誌銘

知浙江麗水縣事安溪李君諱景韓之夫人曰永春陳氏
年六十九咸豐三年七月某甲子疾卒越二年某月某甲
子塋於所遷邑之晉江某鄉某原夫人之考諱朝陽與其
舅優貢生勉湖府君諱宗度交最善廉其子材因妻焉入
門逮事舅姑及其繼祖姑姑陳夫人也繼祖姑鄒夫人也
鄒善怒舅必率其妻子長跼膝前陳請杖夫人亦泣杖引
慝號呼移日言乃謹其夫以嘉慶戊辰領鄉薦每與計偕
摒擋佐之及仕隨浙江所至嵯縣麗水鄞縣一概繁華之
事屏勿用雖處閑貴猶躬作勤勞如初曰一絲一粒皆出
自民吾願守吾素毋折吾福也夫以是益勵廉隅鄞之第

甫下車奉祖母諱去官退而憂索蕭然窘益奇服闋弗能
出山久之病昧時伏時起人不堪擾夫人善事唯謹額以
身代乃瘳適數年遭其喪治之一如其喪舅姑喪繼祖姑
時雖貧必以禮旣而奮厲經理克有以保其家教二子皆
成材能是人之所難而其善之不可以無述也子三東源
前卒時榮道光己酉拔貢時中咸豐辛亥舉人女二適廩
生王廷芳其一殤余少受學於其舅與麗水君為世交而
時榮又與余子同譜故系而銘之詞曰

事重閨得霽顏理家政厥心殫躬勤苦勿辭煩種其德遠
子孫韡弓翟服揚芳烈兮維墓之門

張鬱山墓誌銘

馬兩耳兩目四足相馬者視之而知其能走千里走百里
牛兩耳兩目四足加以兩角僮牛者視之亦知其強弱之
姿順逆之性然移之羊則不能知移之鼯鼠更不能知竊
以為其小不足觀也乃進而移之虎豹犀象則望而卻卻
而犇今夫龍亦兩耳兩目四足兩角使龍降于阿繞于室
相馬者走而南僮牛者走而北彼烏乎知充之而一足曰
夔三足曰能彼又烏乎知何也凡人明於其所常見而蔽
於其所不見吾鄉張鬱山為文尚沉奧不囿於時俗早歲
補弟子員自是婁舉婁不得解以貧授經丹鉛不離席而

抱志以老余向獲交於其伯子師洛而見君之學之必有以知也繼與其季子家駒遊乃惜君之學之必有以知而果無以知也君為人淡泊寡營不為聰明機巧以譁世盜俗中歲喪耦鰥居二十年不再婚年七十有三以咸豐四年三月某甲子疾卒越明年十二月某甲子塋於清源鼎底山下與其配施端人同兆前期家駒持狀來請銘余為世交故銘之君諱南英字顓九鬱山其號也先世居南安明起進士副廣東按察使曰鼎倡循績入府誌其後徙晉江仍編原籍祖際隆考鳴鳳母氏林生母氏藍子四曰師洛道光庚子科副榜前卒曰師澄曰師汀未娶庶曰家駒

咸豐辛亥科舉人出繼胞弟某女四皆嫁為士妻銘曰
其顏頽然其色頽然其學醇然其行罔然持身其郭有道
乎何德之敦也隱節其梁伯鸞乎何氣之溫也山之上墓
之門有穀有穀詒厥子孫

皇清貤贈修職郎松溪縣儒學訓導鄉飲介賓毅亭陳君
暨配蔡孺人合壙誌銘

泉鳳坡鄉稱長者曰陳君諱廷修字懋貽號毅亭壽七十
三而終遲二十四載其配蔡孺人壽九十三而終皆大年
也前喪實道光壬辰三月十有七日後喪實咸豐乙卯十
二月三日初君渴瘞本鄉水溜山下至是從形家言與孺

人合墓石犬之原卽以卒月二十有一日壬子也按鳳懷
陳氏自社站分支始遷祖建申十傳至君父成書皆為農
君服先疇畝少獨力躬耕善為孝父瞽相導不離左右
後乃習會計於城南成素封而母蔡氏年邁九旬服事唯
勤行且老未嘗易意賙卹鄰貧未嘗怠心家既豐儉勤自
勵一切少年飲酒歌呼饒樂放縱之事未嘗涉志少壯迄
老死夫婦相敬如賓孺人蔡氏亦善克相其家君所樂施
贊成之君所承奉相佐之君所督繩申勸之後君綜理家
政數十年合五代孫子元曾食指動以千數區畫必以當
耕讀毋失時蓋幼受教於其家派出蔡寮父質為先儒文

莊公裔禮法猶存焉子五皆後君卒孫二十三曾孫三十
八元孫五其名次官系倣古碑例書於後乃為之銘曰
孝弟力田此上世之風至富而好行其德尤今之所罕觀
而士大夫之所推而崇況復淑慎其身壺有彝則以享天
年令儀令色積厚者流光無已請看後世之子孫俾熾而
昌

第一子國學生浩然傳子宗滿郡庠生經宗賓宗朋從
九品職銜齊福宗羣宗有孫道鳳道儀道山道雲道
田道選道聘道聯道溪道畝道洧道通道富道站曾
孫昭波昭奎昭采昭海昭泗餘未艾

第二子例貢生守忠傳子宗裁國學生鴻猷宗登宗娥
孫道從道保道濟道申道津道傑道琳道敏餘未艾
第三子國學生拱星傳子從九品職銜齊祿宗榜宗瑛
國學生文學宗璽孫道存道連道鞍道熾道本道俊
道煥餘未艾

第四子廩貢生松溪縣儒學訓導捷三傳子宗釵從九
品職銜齊壽邑附生錫周宗甌孫道爵道生道瑞道
標餘未艾

第五子例貢生拱斗傳子宗魚宗濂宗根孫道培道溱
道才道洛道洽餘未艾

王學潤墓誌銘

廿年前京居識王君學潤於郎舍聆言論都風雅無商賈
氣時蓋携猶子夢麟計偕都試也未幾歸夢麟復單騎屢
至京捷進士選都司詢之得君歸蒞菊自娛搜羅奇種日
不暇余京回造其廬適秋從西來琳瑯滿宅栩栩乎如淵
明再世而二子亦以騎射領鄉捷左右奉侍此尤士大夫
之所難而商賈中不可多得者也平生樸實不欺十五歲
隨父之廣瓊貿易杭海屢瀕於險危而復安壯偕弟以行
父老不復出仲季相瓜代服勞如是者十餘年其奉事日
以勤其敦顯均以愛雖饒財為大家自嗜菊而外無他好

衣服飲食悉寡約初居龍山鄉徙龍塘最後徙郡城鄰比
皆洽無浮言年六十四以咸豐五年十二月戊午疾卒越
明年三月乙酉塋所居邑晉江新門外蔡莊之麓君諱長
茂號質慎學潤其字也父溫遜母林氏妻洪妾蔡子七人
夢熊道光甲辰武舉守禦千總出繼君之兄仁厚為後夢
元國學生夢榮亦甲辰武舉夢松庭璜庭璣庭清前三人
洪出後四人蔡出君封文階登仕佐郎武階宣武都尉銘
維此令人省身唯謹一壑一邱以菊為隱謙而能光聲稱
遠近刻此銘詞以彰厥德

龔樸菴墓誌銘

君諱維琚字承礎號樸菴姓龔氏為人辟易不羣九歲隨父市金井十二歲通計倪遂操其術以起長遷郡城家業漸豐念推恩自近始篤於祖葺南塘本支祠宇先小宗後大宗次第以告庶白金三千有奇不科及族人而以父母祖父母主祔塋焉泉以南蔡吳曾積忿數十年不相能君出金為蓋焚燬肆屢助醫瘞憾遂釋兄弟多業學官於朝食於餼舉於鄉而君獨不得志習賈乃勵其子學以成咸豐四年甲寅閏月朔疾卒年五十有七維龔氏遠出渤海其後茂良為宋資政殿大學士家莆田數傳遷晉江元有

以布衣辟縣掾平那兀納有功曰名安尉江西上猶死祀
泉名宦遂世為晉江人君考大占祖烈士皆以君之兄維
琳貴贈翰林院編修湖南提督學政曾祖度人以君之伯
父元貴贈文林郎截選縣知縣君議叙州同銜娶蔡氏吳
氏妾鄭氏子丕樞丕江丕西丕煥丕桐丕丙凡六人丕江
咸豐辛亥舉人嗣胞兄廩生維琛女一適某氏今以旣卒
之二年某月某甲子塋某所山下禮宜銘詞曰

芳艸萋萋石隙陳幽竅其摩白日拊敬宗收族心何歎門
有通德流餘馨教子識字貽一經後世勿忘眎此銘

吳賜谷員外墓誌銘

班書載卜式以鴻漸之翼困於燕爵當漢有事式上書願
半家財助邊遂拜為中郎賜爵左庶長誠千載一時也後
世鮮有及者吾鄉吳暘谷世猗頓業少讀書弗隲奏名詹
事府主簿晉中書科中書通政使司經歷皆未上遂由主
事復納粟薦升員外郎授職戶部山西司牒事未久給假
歸咸豐癸丑適黃逆作亂寇厦門君傾家產募勇隨軍進
剿旋即克復事

聞

帝悅賞戴花翎復以大難甫削眾志未孚團丁壯練於厦
島要隘民以安力勸諸紳輸米京倉由海飛芻而上事竣

新修鳳翔縣志卷二十三
十七
大吏首叙勤勞保升四品銜

旨未下竟以疾卒時丙辰七月廿有四日也年五十有四
為人樸誠和厚與人交胷無城府尤謹守家學克遵父訓
道光庚戌都人士以君本生考孝行狀請
旌表得

旨賜坊遂於所居室之東建祠以祀余於京師始識君又
以前後同部交最善及主講玉屏得日相過從故卽其實
者以紀至其凋卹餘事里黨自能言之毋庸贅君諱葆晃
字道南暘谷其號也先世自南安遷同安廈門曾祖贈通
奉大夫捷甲祖布政使司理問自良考乾隆乙卯舉人洪

本生考候補知府乙卯與兄同榜

欽旌孝子瀄君娶許恭人妾某氏某氏子階亨郡附生卽
補訓導前蔭卒定安太常寺博士階秀階升俱幼女一字
同里蘇瑞雲今以旣卒之明年某月某甲子薨於某所山
下禮宜銘詞曰

其人質而樸其額豐而腴出家之所儲以為

國討賊而助乎軍之需加以士甲組練奮臂而呼防彌有
階輩如黃圖宜乎與漢之卜式見述於後世而爵為大夫
莊母陳太恭人墓誌銘

福建羅源縣學教諭嘉慶戊午舉人莊君諱一鳴之夫人

累贈中憲大夫縣學生諱肇崧之母兵部員外郎

記名御史

欽加四品銜

賞戴花翎道光乙未進士名志謙之祖母姓陳氏

累封太恭人其卒咸豐六年之十二月庚戌其塋以明年
二月壬寅祔於惠安城東下社溪教諭君之兆其側以子
肇崧及其婦曾氏二柩從肇崧伯氏也貴封乃卒其仲肇
泰國學生

貤封奉政大夫出繼叔父維極其季肇隆郡學生

貤封朝議大夫其孫志謙官前叙志中增貢生卽補訓導

志正附貢生試用訓導志廉國學生選齊奏廳志勤志仁
七品軍功志誠志學志功例貢生志道志諒其曾孫觀瀾
前卒觀潮咸豐乙卯副榜觀海郡廩生觀瀚亦乙卯副榜
觀濤觀渚觀濤觀漢觀浩觀瀛縣附生觀澤觀汀觀淵觀
淑觀泗觀洪觀濬觀洋觀汶觀澧觀泮觀汾觀治其元孫
槐蔭桂蔭棠蔭柏蔭樾蔭梧蔭喬蔭其墓晉江陳慶鏞誌
之曰惠安莊氏世業詩書教諭之考諱其融以增廣名儒
教授於鄉一時士多嚮風知廉恥夫人及拜其舅與其姑
受其夫之榮而享其子與孫之祿其壽至於八十有九其
葉至於五傳孫子元曾男女逾百數

國朝之制於貞壽有旌於五代同堂有旌然必累世承歡
乃與是舉道光二十九年元孫生禮臣以是請得

旨賜如例余與兵部宦遊京師久旣而締以姻親習聞家
政知夫人之勤懃恪恭其為婦也孝其為母也慈其處族
黨也惠而好施則其所以享奇齡而膺遐福者良有由也
昔讀周召二南自關雎而下采蘋采蘋以諸侯大夫妻能
循法度厚其風俗至於江漢汝墳士女莫不承式竊歎其
時民用和睦上下無怨古處之敬晏如也以夫人而當其
盛入之詩歌更不知如何格被若余之鄙又曷能測其所
至哉夫人之祖曰某考曰褒銘曰

有姊淑女來嬪于莊鳳皇協卜五世其昌夫婦相保一耄
一耄既壽而臧縣縣瓜瓞貽謀有穀樞曹觀政子復生孫
副卓同乘淑哉夫人秉是壺彝五氏來備死有缺虧天厚
其鍾

帝申其錫銘以紀之實維載德

黃母林氏卓氏附子郡學生世璐墓誌銘

初國子生黃君清峯娶夫人曰林氏副室以卓氏各索而
得男焉寡其子世璐長與余友每言輒潸潸淚下老復告
余曰吾先子見背久矣時吾母年若干吾庶母年若干慟
絕復蘇旣而誓靡他飲血吞聲相與事吾祖母款曲盡誠

祖母病瘁母侍湯藥腰不解帶凡衣服厠踰庶母任之時或相更替不離側嘗述吾先子於乙卯年饑平糶浯江活者萬計歸復賑鄉閭余卽以是年生且勉且勸余有弟曰世瑚吾庶母出也母愛之如其出而吾庶母之愛余也亦如吾母之愛吾弟如其出至老跬步必隨族咸以姊妹目之惜余僅食一簋而吾弟以騎射捷嘉慶戊寅鄉科年又弗永今吾母吾庶母老矣恩無以報也余聞之悚然矜式迨甲寅京回識已先後奉諱家居病羸不數月復訃至為之於邑不樂越二年其孤始以三喪合葬節畧來請銘且曰父遺命也願乞言以文諸幽余按畧二母間行已詳諸

其言而世璐善承慈教克踐乃父風日自度歸渡五通過
夫妻負逋將鬻子以償為解其囊而代之曰是吾母與吾
庶母之志也重陽族宰牛大酺歲以為常令除去亦曰是
吾母與吾庶母之志也遊庠後卽以二節母狀上

帝報可遂迎起居并祿位入祠如禮牲汲汲於濟世嘗謂
士不能為良相亦當為良醫乃習岐黃五色多中道光之
一十一年英夷犯順泉戒嚴出沿海一帶聯莊民從之官
悅叙六品軍功人皆謂有是母乃有是子東海之稱溢於
閭里母林壽八十一而終實咸豐癸丑四月某甲子庶母
卓壽七十五而終實咸豐甲寅四月某甲子世璐卽以奉

阜諱後秋七月某甲子卒年六十字哲貞號蓮石不諱者
於其母之前例稱名世璐兩娶皆王妻楊子廷策庠生前
卒廷策殤金釗武生樹棠增生文閣文淵文斗俱少樹棠
為其叔父世瑚後而世瑚又為其伯父庠生清芳後成父
志也世瑚除繼嗣外有子曰廷簠因卓氏故備書歲在丙
辰三喪葬於某所山下嫡庶同穴母子相依示不忘初以
全孝也乃為銘曰

有共姜之義而不以弛其孝有陶母之風而不以斲其教
同勵冰霜而以柏舟自効子能承志用式于門閭用光于
學校烏私反哺猶依依於九泉親承笑貌刻而銘之藏諸

幽窮

誥授振威將軍福建水師提督林公墓誌銘

國朝水師之將推泉州嘉慶初年李忠毅邱剛勇尚矣近則忠愍剛勇二陳名振華夷勛載史冊然各以武自奮至於父子麾鉞世炳旂常則推安溪提督林公公粵東陽江鎮總兵篤齋府君中子也幼雋異與羣兒戲以兵法部勒指揮陳忠愍公見之曰是兒當以武顯壯嫻弓馬習方畧年十七入縣學武生由水師提標左營額外拔外委粟階把總千總以擊夷匪功晉銅山守備遷左營遊擊權督標水師營叅將既除真拜閩安協副將歷署海壇金門福甯

各鎮總兵凡卽募皆以簡軍實明訓練為事故所在奸宄潛蹤軍威一振咸豐二年補福甯鎮總兵官是郡環山濱海地貧竊適旱疫交作而匪徒乘機煽謠商漁裹足公至首唱勸鋹平糶招商赴臺灣採運接濟步祈雨於大山禳疫於東澳三日雨作疫遂息百姓歡呼捕通洋巨梟數十人水陸以安三年夏逆匪黃位寇廈門林俊寇仙遊巡撫王公駐泉堵剿公以雙溪口與賊仔澳互角為賊竄海要津卽會師南下越明年五月逆舟果屯賊仔澳公用所駕艨艟乘上風蹕入賊隊焚其船賊首尾橫斷大敗奔駭公復逆沂至長表洋犁沉三船追獲盜首黃煙等二十餘名

置之法是時也黃逆遠遁無蹤於是閩洋稍靜而艇匪數十復蠢擾甯波奉化等郡縣浙洋大震督臣薦署提督浙江公馳至卽檄兵四百防守鎮海飭千總布興有分領戰艦先攻帆礁洋沉其艇三生擒蓬仔帶並逆婦八十三名奪其艇六公曰是非大創而芟除之不可乃飭象山協副將率兵沿海兜截俾無竄逸時夷人素警公名請以火輪船從師進剿八月初七日會於石浦洋適北風驟作揮師直入礮煙漲天諸師無不奮呼鼓噪海水沸揚逼近賊壘用火斗飛捷而下碎大小艇二十三斬馘焚斃落海者無算生擒馮阿瑤等四百餘名越日復尾追搜捕殺賊二百

祖道松父志忠卽篤齋府君也三代皆贈振威將軍曾祖
妣氏鄭祖妣氏吳母氏吳生母氏蔡皆贈一品夫人公元
配周夫人前澎湖守備諱萬生女先公十一年卒繼配吳
夫人妻李孺人子五繼恩廣東縣丞繼惠業儒周出繼福
繼禧吳出繼禎李出女二適楊適陳以咸豐七年四月三
日扶公柩於同安紅石崙山下啓周夫人窆而葬焉禮也
嗚呼公自弱冠隸戎行慨然以韜鈴自負旣而位躋顯秩
名紀太常然不足為公多也惟所鎮則軍成勁旅所遷則
民表去思而令終之日能使羣亮懾服感激涕零非古名
將之風歟雖年僅中壽榮始哀終可無憾矣銘曰

九牧後昆挺生奇傑陽春勒勛茂林隱潔公也繼之克紹
世閥名高仙霞功炳甌粵惟忠惟孝曰篤不忘翼翼桓桓
於前益光鄞江去思安圯砥柱匪直才華其德實普吁嗟
乎大樹飄零兮衆軍欹銘之幽宮兮金石暉

稽經堂類藁卷第二十四

晉江陳慶鏞頌南撰

誄 祭文 募啟

貞孝趙姑哀誄有序

姑趙氏陽湖人父諱學彭河南縣丞母劉氏太宜人今贊
善振祚之女兄也幼讀書畧通經義年二十一舅氏劉禮
部逢祿為主婚許嫁戶部主事青陽王翰雲為繼室故兵
部尚書諱宗誠之冢婦也未及歸遭父喪已而北行舟入
潞河翰雲之訃至左右秘其事姑察知之泣語贊善曰徇
名非我難亦非我期我在塗方以母多病妹弱不可專恃

一日九迴腸耳往恐不得卽歸盡令我歸而一意奉母終身乎遂反棹贊善為恭毅公六世孫家極貧姑以十指佐養裁給饔飧閱十年尚書廉姑守義貽書其家迎歸京第姑旣入京謁尚書執婦禮是為道光十一年六月越二年請於尚書仍歸侍母如初十七年尚書薨歸葬青陽姑奔喪歸東壩上備歷艱險窀穸事畢復反陽湖二十三年贊善迎養太宜人京寓姑侍母來依不去二十五年十二月八日以疾卒於贊善家年四十有六屬纊之時呼母者再斂手正容而瞑前室子兵馬司副指揮守熙將奉匱歸合葬父墓贊善閔姑志是狀屬慶鏞為文以永之典宜旌於

禮當誄詞曰

河水之旁臺築懷清空山之木獨秀女貞女貞鬱鬱枝柯
時第淑氣所鍾勿刻勿祓於乎哀哉維姑秉靈受姓天水
幼而能賢習知書史乃遭未亡心誓之死浩浩育育柏舟
自矢維德之貞清白勵節石也其剛玉也其絜松柏歲寒
獨凌霜雪衛婦貞義均此芳烈於乎哀哉維姑奉親弗離
左右十指辛勤以佐餬口既殯青陽終旋母里毘陵舊居
骨肉相倚維德之孝顧瞻嫠媳弟妹童孺疾痛扶持汝泣
亦泣汝嬉亦嬉河東孝女未足專奇於乎哀哉慈暉日長
蕙芽已施中壽何慳九泉長已維行可旌維名可紀曰貞

曰孝于塗應誄於乎哀哉告爾幽明繩斯壹惠式祔嘉名
永垂奕禩

祭始祖靈源公墓文

維咸豐五年二月甲午朔越六日己亥十五世孫
賜進士出身掌陝西道監察御史慶鏞等謹以牲醴庶羞
敬奠于

始祖考靈源公暨

始祖妣黃夫人之靈曰

粵稽我陳肇祥媯汭洎及潁川明德繼世自晉入閩用光
門第我公來泉世以奠繫卜宅錦亭爰始爰契卜壤靈山

如帶如礪馬鬣其封高指鳳髻人鏡初開芙蓉日麗葛藟
藟之枝葉聯系簪笏冠裳容容裔裔事業科名秩秩棟樑
遐溯我公起家孝弟念昔先疇丕式勿替敢用庶羞歲以
時祭有飮其香嘉薦益齊尚饗

祭林母蔡淑人百有四歲文

於戲合章節三萬八千良辰數由旬六百四十甲子於天
為姍星於地為女史其來也鹿女持花其去也鶯王排圮
渺渺若聽紫雲之曲前導以旌旗而不可褻視猗歟林太
姻母蔡淑人梯幾戴勝參服元根稟靈泰室毓粹瑤崑本
是金山之女歸于鼇水之門迹其徽音之著姆教之垂於

關雎見琴瑟之友焉於桃李見家室之宜焉於采藻見宗
祀之敬焉於卷耳見勤儉之為焉於鵲鳩見均平之愛焉
於螽斯見逮下之慈焉聞鵲渡萬聽鵲酸絲蓋以桓少君
之懿範兼文伯母之風規曹大家之鑒識聯李絡秀之操
持故能光益家道合豐約而克善其施劬劬疊疊秉德象
者百有四棋加以金馬碧雞之建青鸞紫鳳之披百祿是
總

天錫壽母以表其門楣况復榮開六葉蘭蔭繼以孫枝文
應郎官之宿武專闡命之司森森玉立九華八爵仰重幃
而共拜以多嬰天下親者咸以為景星慶雲之復出瑤華

朱草之呈奇而太姻母荆釵裙布恬澹自居和熊示教封
鮒遺書其散贍六族也推窮卹寡而弗厚其儲乃以屠維
作噩之年孟陬之月委蛇示蕙草隕菴蘭衆香國采衆香
國去但見拈花微笑隨寶馬與香車望靈風之颯然執杯
捲之卷然問九重兮呼三閭維茲似續續古之人履霜露
能弗涕淚而沾裾慶鏞拜元伯之庭幃識小同之純孝忝
附葭盟夙聞荻教用表鍾郝之遺風以為閨門則儆馨歆
在耳謹奠以旨酒之清而為醺為醉哀哉尚饗

祭侯官林文忠公文

嗚呼世之需才也孔亟而才之用世也恆艱夫何天下有

捐百身起九原之思而公之英靈天獨去其恆幹善

君有成三五升二八之度而公之登用天不假以歲年鳴

呼哀哉惟公之生實稟間氣心與斯人共憂樂身係天下

之危安其褻躬也如景星卿雲雖或韜沈不能匿其光采

其行事也如規懸渠設雖有倂錯不能改其方圓其布德

宣惠也如父母之慈霖雨之被其詰姦敵愾也如著龜之

靈雷霆之震其功利之及於物也蓋不可以筭閱不可以

數計其威望之重於世也蓋無分於夷夏無間於存亡昔

者司馬文正公之在洛也兒童走卒皆知其賢及其入相

中朝竟以鞠躬盡瘁致隕其身王文成公之泣贛也手剪

鯨鯢宏濟時艱及夫起征粵西亦以力疾從戎終於嶺嶠
之間公之德望勲業生平出處與二公若合符節相輝映
於後先然二公不過聖明之主而我公獨遭

堯舜之君宜乎出埽氛霧入秉樞鈞躋

治化於隆古溥膏澤於生民而孰意公之甫出而卽逝也
方慶

明良之遇遽羅命運之屯豈謂真儒之效世將不覩抑觀
德化之成公獨緣慳耶斯吾黨之士求其說而不得而曷
禁乎涕淚之潺湲嗚呼哀哉公之精誠格於

黼座師範浹於簪紳轍迹環於海隅尸祝徧於榆枌固將

焜煌夫百代奚徒矜繼於吾閩惟桑梓之瞻依實甫申之
自降而海防戎索又公之所顧念而憂勤公歸自天雲車
風馬於何不屆而裴回勿去者其將在乎霍童之麓與洪
塘之濱雜蒔蔬而致奠儻鑒格於斯言嗚呼哀哉尚饗
祭孔俊峯昭杰大令文

惟君之生垂範作則立身全歸紹聖秉德詩禮之訓六十
八傳衍聖析派四世相沿君之先人典郡三輔君始趨庭
詩誦象舞三年盡禮弦琴載張保世弓冶蜚英虞庠

仁廟臨雍來陪鉅典錫貢成均文儒俊選監州未赴鄉舉
旋膺天府獻書禮樂賓興懸流待化搏風尚息陟屺載瞻

祿養是亟掌筴一官藉奉安輿饘粥銘鼎家風晏如鹽漬
淮塿邑符是綰琴歌頌聲比戶連版蕺綱轉運淮江襟帶
建議均輸匡燭卦繪霖潦汎濫中澤鴻哀惠均挾纊歡溢
驚雷使者彈章風聞誤煽邑境安恬循良始見卓魯懋勛
宜登上考吏議左遷蕭然就道君曰子弟通籍綰符予曷
不歸左右承娛帷幔起居滄漣飴蜜環堵詠歌紹繩緼帙
中庸祖述曾孟幽聞菟采全歸綜貫魚繭垂訓著作發揮
篇章世業蔚起文學升堂孝友家政遷豆樂豈舉案悲悼
靈光獨在慈闈上壽表德上阡七十不毀哀禮三年師席
名山諠諠導誘羣仰德聲願介眉壽吁嗟我君愍不少延

少微沈光回飈溘然吁嗟我君靈爽焉邁丹旒凌風露冷
金薤君之中子紫微載筆猥託素交準繩丹漆仰止世德
放像遺靈筵几肅設椒桂芬馨薊門而南湖君舊遊沈沛
交橫洙泗滙流東山峩峩下維聊鄉式攀雲車歆哉嘉嘗
尚饗

建立泉郡育嬰堂啟

夫事有其舉之莫敢廢也有其廢之莫敢舉也獨吾泉育
嬰堂寢舉寢廢於是說者紛紛言舉之難議而復息余上
年道寓蘇門潘公子功甫寓書來船言泉人溺女甚於他
邦子歸而不謀所以拯救君子將於是焉責余聽之而思

未能也既又思以言倡恐雷門布鼓終不入聽比抵里知
同人已有先我而為之惜事中止概從廢莫敢舉之列竊
以為事苟行之而無裨於世無關於人心風俗則舉之可
也廢之可也事苟行之而有裨於世有關於人心風俗則
舉之可也廢之不可也吾泉溺女相積成風貧固有之富
亦不免其甚者有生而搯其頸批其顱備極慘毒風俗之
敗莫此為極察其故或迫於時勢之艱難或以育女太多
希冀得男因而為此酷熱之舉夫啟螫不殺方長不折於
物且然而況於人乎而況於親生之女乎唯執國人之諄
諄告誡彼昏不知溺者轉熾則戒溺莫急於救溺救溺莫

急於收乳考之周禮保息六養萬民一曰慈幼王制幼而無父者有常餼月令仲春養幼少存諸孤而漢章帝詔嬰兒無父母親屬及有子不能養食廩給如律實為萬世育嬰權輿我

朝雍正二年

世宗憲皇帝宣諭中外設立育嬰堂而泉之堂舊在城南溪亭里則有其舉之莫敢廢也第年久傾圯毀莫能興一思遵復前規鮮不以為迂濶故舉若斯之難也然以實心行之則事亦無不竟成夫匹夫為善能救一人即造一人之命矧所溺之女救者一人而受其救者非止一人誠能

拯一人則一人有室矣拯數十人則數十人有室矣拯數十百人則數十百人有室矣推而極之子又生孫孫又生子所活何止千萬計後漢書賈彪傳彪任新息適城南有盜殺人城北有婦殺子彪曰賊寇害人此則常理母子相殘逆天違道遂先發其罪賊聞之面縛自首數年間人養子者千數密是則拯溺一行而盜賊知警卽鄉曲無無賴之徒械鬪之風或庶幾乎熄余故曰有裨於世有關於人心風俗事在必舉也前與宗人廣文君松議此事未匝月而抱女者紛至沓來積三十餘嬰廣文暫為設法寄乳唯事在必成後者難為繼必有良法美意庶可遠行今酌取

各處章程擇善而從其醵金則浙江體仁局稱最先約定
題金令出者足以從容展布其寄乳則近倣詔安安海為
之越語生三人公與之母生二人公與之餼是卽古人分
養寄乳之意蓋一以恤孤一以濟貧於法為便吾鄉敦行
善事好義諒不乏人倘能解囊樂輸共襄盛事則種德當
有明徵易曰積善之家必有余慶禮曰敦善行而不怠將
有聞余言而與余同心不為習俗所囿者謹啓

安海育嬰堂募啟

安海育嬰堂其創始難於泉而其善後宜易於泉泉以五
邑通都人文輳聚好施者眾願力可以負山安海則地沃

一聚其井竈戶版不及泉百之一縱有大木難為廣廈之
支然地狹則居少居少則淹溺之風亦少其經費度支亦
不過泉百之一故曰安海之育嬰堂其創始難於泉而其
善後易於泉也乃泉未建而安海建之衆志成城一鼓作
氣已為好善倡而泉越數年始建計今三載經費每年得
支三之一安海之建年倍之計經費每年轉不得支十之
二則又似安海之育嬰堂創始易於泉而善後較難於泉
此何故哉泉集搢紳之倫輓轡稽查隨時籌畫缺者衷之
城市通衢耳易聞目易見有呱呱而泣者未嘗不傅之翼
之相與拯救之所謂乍見孺子將入於井皆有怵惕惻隱

之心安海去城遠耳不及聞目不及見卽有大聲疾呼而應之者寥寥且泉之建日月少故力猶強安海之建日月多故力少頓是以難易殊歟然好德之士所在皆有春秋傳曰人之欲善誰不如我矧安海為泉南一都會也古號安平載在周禮與保息為一書慈幼之經又其所夙講其中聚族比閭匪無完心郵政可以共襄盛舉苟或遠方聞知向義體天地好生之心當亦勤閔鬻斯其上者無難解囊以助卽下而儋石之家需之一絲一粒亦不為無補願力行不倦斟酌盡善行之經遠毋於所難者銳而為進而於所易者小而不為書曰為山九仞功虧一簣是在有以

善其後者且安海育嬰堂之設可以分衆之所收亦可以
備衆之所缺濱海附近鄉村以及南邑毘連皆可赴而投
之以資乳養於民為便於法為良是安海之有育嬰堂即
衆之有育嬰堂也安海育嬰堂之當善其後即衆育嬰堂
之當善其後也唯留心風化見善必為獎之勸之繼之續
之是則余之所厚望也夫是則衆人之所厚望也夫道光
二十有九年六月初吉郡人陳慶鏞纂於玉屏書院
重修開元寺募啟

易曰聖人以神道設教而天下服矣古來化民成俗道齊
之以政刑德禮而復設教於神者誠以人道邇神道遠邇

者民易狎遠則民畏而敬之意非明民將以愚民河出圖
洛出服天猶神其道而用之故曰知變化之道者其知神
之所為乎自浮屠氏興以清淨為高以虛無為尚儒者起
而闢之廓如也然摩鳩羅什楞伽涅槃諸經其旨大都勸
人為善麻代存之則亦神道設教之一端也泉開元寺建
自唐垂拱二年本黃氏故宅相傳地有桑樹生蓮遂建為
寺紫雲常來往於其間故亦名紫雲寺宋祝穆方輿勝覽
紀堂宇靜深為天下開元寺第一中為大雄殿殿後有壇
名戒壇大可容千餘人別為院百二十東西二塔甲天下
國家恭設

龍壇寶座官斯土者祝

嘏恆於斯祈年禱雨恆於斯飲射讀法恆於斯則非第為
選佛名場實為

薦釐福地乃歲久煙蘿棟宇零落寺僧復本憫之思所以
興建以募啟徵余言余難之謂泉頻興土木朝營一剎募
營一剎茲復煩將作大匠恐非所以便民懇未有以應也
僧益請之堅余曰洛陽伽藍記南朝四百八十寺寺寺琳
宮碧瓦迄無一存雖以叢林四門頂佛託鉢終莫之應而
欲效廣長舌召人金錢之用不綦難哉懇仍未有以應也
僧乃請書數行渡海東聊作一試至佛果顯三十二相見

者咸錯愕驚訝踴躍輸將不數日積朱提四千四百有奇
余曰可矣是僧之積而誠故神之顯而應也第廣廈幷幪
非杞梓之材不足以承中廡也非梗柁之質不足以綴四
阿也必得龍象大力乃能濟事然海內布德行惠頗不乏
人豈無富室傾千金之橐不為多亦有貧家獻一斗之粟
不為少太上結八萬四千獅子座其次廣祇園八十頃其
次築毘邪十笏古德支那每見人而憫之今丈六金身風
棲露宿人亦當見佛而憫之佛憫人而人不知人憫佛而
佛斷無不知吾幸佛之憫人之憫而尤幸人憫佛之憫其
憫也苟從此廣布恆河沙無善無不善洗心退藏於密禁

氏為非曰義是亦神之所許聖人所不廢者必謂修建壇
宇瞿曇者之所為吾黨弗道曾亦思地為泉南保障載之
縣志郡志省志一統志天下說禪林於必之及焉譚形勝
者又必之及焉昔為金碧今為黃土繼特邦人之恥抑亦
士大夫之羞所願與薦紳之倫削之庶之落而成之俾異
日設縣叢習典禮祝

嘏如故祈年禱雨如故飲射讀灋如故是神道也易道也
聖人之道也繫辭曰唯神也故不疾而速不行而至神其
有以致之來庶藜鼓弗勝不日而成其受命焉而以言如

鄉

重修福清寺募啟

泉築大士林祇園無慮數十旃也貝葉無慮數百樹也三
乘五宗七寶無慮數萬卷也而稱最古者南則龍山寺北
則福清寺二者為冠龍山建自隋而福清建自五代刺史
王延彬築以寓高麗僧元衲也地居靈秀峯下亦曰翠屏
山晉南交界之區而郡北一大屏障也廟貌興廢數數更
嘉慶丁卯重修其時說青島者以地沮洳則土圭稍徙而
上迄今四十有一載矣蒸成茵不勝載棟阿印有旨藹又
不勝汎醜蟬有殷掘閱為患西北觸不周風杌櫟如繫
卵友人林茂才廷琮議倡修請啟事余曰屢修屢廢修其

如廢何而屢廢屢修廢亦其如修何然必更諸爽塏俾風
煙得無蝕焉蟻螳得無穿焉詩曰相其陰陽觀其流泉度
其隰原斯為大矣林君曰否否今以二麥未登農方衛均
田大興畚揭勞民與傷財交困且易置方位今人未必遠
勝前人不如毀者褒之斜者整之扁者彌之蝨者易之翼
以窳窳然通以闔軒軒然淘以并鑿鑿然濬以渠坎坎
然氣疏則風直風直則螳不僵蟲不穴茆龍第取更衣無
煩改作如之何余曰善天之所壞不可支也而天之所支
亦不可壞吾儕小人皆有闔廬以避風雨矧神靈翔泊之
所忍令鞠為茂草而莫之顧是豈不佳相之謂乎因思泉

多好義衆志成城固無難事是必有起而應之者昔高忠
憲公出為令凡意內古先聖賢及山川祠宇載在祀典者
隨塌隨修用力少而成功多民到于今稱頌請定鳩賢之
灋就農出屋粟其猶醵與種樹作旃檀將在德矣記曰凡
有功德於民則祀之能捍大災禦大患則祀之神為保衛
全邦出雲降雨呼之輒應則其有功德而兼能捍災禦患
者也其亟修之毋緩是為啟